

इवनिंग डोगरी न्यूज़ बुलेटिन
समे-18:15 Hrs

Headlines

- 1 प्रधानमंत्री नरेंद्र मोदी होंरें राश्ट्रीय पंछान गी आकार देने च भाषा, साहित्य, कला ते आध्यात्म दी भूमिका बारे आखेआ।
- 2 मुख्मन्त्री उमर अब्दुल्ला हारें उंदी सरकार दी पैहली-पैहली कैबिनेट बैठक दी अध्यक्षता कीती ते आखेआ जे समूलचे जम्मू-कश्मीर च बुनियादी ढांचे, सेहत दिक्खभाल, शिक्षा ते रोजगार गी बढावा देने दी नमीं सरकार दी प्राथमिकता ऐ।
- 3 सुरक्षा बलें जिला पुंछ ते राजौरी च आतंकवादियें गी फगड़ने गितै इक बड्डा तुपाई अभियान रम्भेआ।
- 4 राश्ट्रपति, उपराश्ट्रपति ते प्रधानमंत्री नरेंद्र मोदी होंरें अज्ज वाल्मिकी जयंती दे मौके पर सब्बनं गी ममारकवाद ते शुभकामनां दित्तियां न।

<><><><><><>

PM-Abhidhamma

प्रधानमंत्री नरेंद्र मोदी होंरें जोर देइए आखेआ ऐ जे भाषा, साहित्य, कला ते आध्यात्मिकता जनेए सांस्कृतिक थम्म कुसै बी देश दी पंछान बनांदे न। उनें आखेआ जे अज्ज जिसलै तरक्की बाद्दे दी बत्तै पर तेजिया कन्नै अगडे बधै करदा ऐ तां ओहिदियां जड्डां आत्मसम्मान, आत्मविश्वास ते स्वाभिमान कन्ने बडी गैहराई तगर जुडी दियां न। अज्ज नमीं दिल्ली च अंतरराश्ट्रीय अभिधम्म दिवस दे सिलसिले च आयोजित इक कार्यक्रम गी संबोधित करदे होई प्रधानमंत्री होंरें भगवान बुद्ध हुंदी सिक्खयाएं दा जिक्र कीता जे समस्याएं दे हल, जंगें-लडाइएं च तुप्पने दे बजाए महात्मा बुद्ध हुदिएं सिक्खयाएं च हुंढने गी रमानदारी दी बत्तै पर टुरने लेई प्रेरित करदियां न। उनें आखेआ जे भारत एल्लै अमृतकाल चा गुजरा करदा ऐ ते बड्डे बदलाव आली एह यात्रा 2047 च सम्पन्न होग, जदूं तगर भारत इक विकसित राश्ट्र बनी जाग। प्रधानमंत्री होंरें नौजवानें अगगे अपील कीती जे ओह विज्ञान ते टेक्नोलॉजी दे क्षेत्र च अगडे बधदे होई अपनी संस्कृति ते मुल्यें-कदरें पर मान करना। पाली भाषा गी शास्त्रीय भाषा दा दर्जा देने दे सरकार दे फैसले पर मोदी होंरें आखेआ जे भाषां शडियां गल्लबात दा गै जरिया नेई न, सगुआं कुसै बी मुख्मन्त्री दी सभ्यता ते संस्कृति दी आत्मा बी न।

<><><><><><>

Omar-Cabinet Meet

जम्मू-कश्मीर केंद्र शासित प्रदेश दे पैहले-पैहले मुख्मन्त्री दे तौरा पर सगंध चुक्कने दे दऊं दिनें मगरा उमर अब्दुल्ला होंरें अज्ज अपने मंत्रिमंडल दी पैहली-पैहली बैठक दी अध्यक्षता कीती। बैठका च मुख्मन्त्री सचिव अटल डुल्लू ते होर सीनियर अफसर बी मजूद हे। बैठका च प्रमुख प्रशासनिक मुद्दें पर गल्लबात कीती गेई ते सरकार दिएं सब्बनं शा पैहलिएं तरजीहें पर प्रमुखता कन्ने सलाह सूत्र कीता। नमें बने दे मंत्रिमंडल नै सरकार गी दरपेश चुनौतिएं, प्रक्रियाएं गी तरतीब देने, लोकें दिएं दिक्कतें-शकैतें गी दूर करने ते नौकरशाही च पूरी चाल्ली पारदर्शिता यकीनी बनाने दे बारै च बी तफसीली सलाह-सूत्र कीता गेआ। मंत्रिमंडल दी टीम नै जारी विकास परियोजनाएं दी रफ्तार ते प्रगति दा बी जायजा लैता। बैठका च आखेआ गेआ जे सरकार दिएं प्राथमिकताएं च ढांचागत विकास, सेहत दिक्ख-भाल, शिक्षा, कम्म-रोजगार दे मौके पैदा करना ऐ। मुख्मन्त्री होंरें कल बक्ख-बक्ख मैहकमें दे सचिवें ते होंरें अधिकारिणें कन्ने सिविल सचिवालय च बैठक लाई ही।

<><><><><><>

PM-Dance Festival

प्रधानमंत्री नरेंद्र मोदी होंरें आखेआ ऐ जे संगीत ते भाषा जेडियां देशें दिएं सीमाएं कोला पार पुजदियां न, ओह दुनिया भरै च समझियां जंदियां न। नमीं दिल्ली च चलै करदे भारतीय नृत्यें बारै पैहले-पैहले अंतरराश्ट्रीय उत्सव लेई जारी अपने स्नेह च

आखेआ जे नमीं पीढी लेई नाच बड़ा महत्वपूर्ण ऐ कीजे एहू भारत दी सांस्कृतिक पंछान दा अनचूट हिस्सा ऐंउनें आखेआ जे इस चाल्ली दे उत्सव स्हाड़ी नौजवान पीढी ते पूरी दुनिया गी बी भारत दिएं सांस्कृतिक ते कलात्मक परम्पराएं कन्ने जोड़दे ना।

<><><><><><>

President Visit

राश्ट्रपति द्रौपदी मुर्मू होर त्रै अफ्रीकी मुलखें दी यात्रा दे त्रीए ते अखीरी चरणै च अज्ज मलावी पुज्जियां। मलावी दा दौरा करने आलियां ओहू पैहली भारती राश्ट्रपति ना। उत्थे पुज्जने पर राश्ट्रपति हुंदा निग्गा सुआगत कीता गेआ। ओहू त्रै दिनें तोड़ी मलावी च रौहंगन जिस दौरान उंदा दपक्खी ते शिष्टमंडल सतह दिएं बैठकें च शिरकत करने दा कार्यक्रम ऐ। एहूदे इलावा उत्थे रवा करदे भारती मूल दे लोकें कन्ने बी मिलंगन। ओहू मलावी गणराज्य दे राश्ट्रपति लाजारस चकवेरा हुंदे कन्ने मलाटी करंगन। कल गै ओहू किश शिष्टमंडल सतह दिएं बैठकें च बी हिस्सा लैडन। एहूदे अलावा ओहू उत्थूं दे राश्ट्रीय युद्ध स्मारक, अजैब घर, श्री राधा कृष्ण मंदर ते मलावी झील दिक्खने लेई बी जाडन। 19 तरीक तगर दे उंदे इस दौरे दा मकसद दौनें मुलखें बश्कार सरबंधें च मजबूत आहनना ऐ।

<><><><><><>

Shivraj-MSP

राई-बाई मंत्री शिवराज सिंह चौहान होरें फसल गी बजारें च बेचने दी रूतै 2025-26 लेई 6 हाड़ी फसलें दा घटोघट्ट समर्थन मुल्ल यानि एमएसपी बढ़ाने दे फैसले लेई प्रधानमंत्री नरेंद्र मोदी हुंदा आभार प्रगट कीता। राई-बाई मंत्री होरें आखेआ जे नरेंद्र मोदी सरकार गै ऐ जिन्नै उत्पादन लागत पर 50 फीसद शा मते मुनाफे देने आहली एमएसपी पर खरीद दा फैसला लैता ऐ। नमीं दिल्ली च मीडिया कन्ने गल्ल करदे होई चौहान होरें आखेआ जे कनकू लेई एमएसपी 2 ज्हार 425 रपे तैय कीता गया ऐ। जौं लेई 1 ज्हार 980 रपे, चने लेई एमएसपी 5 ज्हार 650 रपे, मसूर लेई एमएसपी 6 ज्हार 700 रपे, सरेआं दे बीं लेई नमें एमएसपी 5 ज्हार 950 रपे ते सनफ्लावर लेई 5 ज्हार 940 रपे फही क्विंटल तैय कीता गया ऐ।

<><><><><><>

LG-LLC

उपराज्यपाल मनोज सिन्हा होर अज्ज लेजेंड्स लीग क्रिकेट 2024 दी जेत्तू ते दुए नम्बरै पर आई दिएं टीमें कन्ने मिले। लीग दा फाइनल मैच कल श्रीनगर दे बक्खी स्टेडियम च खेडेआ गेआ हा। टीमें च साबका अंतरराश्ट्रीय क्रिकेटर युसफ पठान, शहबाज नदीम, उलटन चित्रुम्बरा, हमिल्टन, निखिल चोपड़ा ते होर दुए टीम मिम्बर, टीम मालक ते अधिकारी शामिल हे। उपराज्यपाल होरें इनें सीनियर क्रिकेटरें गी ममारकबाद ते शुभकामनां दित्तियां ते उंदी निष्ठा, खेडूए जज्वे ते इस श्रृंखला दौरान प्रदर्शन दी रज्जिए तरीफ कीती जिन्नै इस प्रतियोगिता गी यादगार बनाई दित्ता। इस लीग दा फाइनल मैच सर्दन सुपर स्टार्स ते कोणार्क सूर्यास ओडिशा बश्कार खेडेआ गेआ जिसी सर्दन सुपर स्टार्स नै सुपर ओवर च जित्ती लैता।

<><><><><><>

Search-Operation

नियंत्रण रेखा कन्ने लगदे राजौरी ते पुंछ जिले च सुरक्षा बलें बक्ख-बक्ख इलाकें च बड्डे पैमाने पर तुपाई अभियान शुरू कीते देना। अधिकारिणें आस्सेआ दित्ती गेदी जानकारी मुजब जिले दे गुरसाई टॉप इलाके च मूरी शास्तार इलाके च किश आतंकवादिणें दी मजूदगी बारै इक टकोहदी सूह थ्होने पर इलाके गी घेरिए तुपाई अभियान शुरू कीता। सुरक्षा बलें आस्सेआ ललकारे जाने दे बाद किश चिरै लेई दबक्खिय गोलीबारी बी होई। आतंकवादिणें फगडने लेई अभियान तेज करी दित्ता ते जंगलै अंदर उठी गेदे आतंकवादिणें दा पता लाने लेई खोजी कुत्तें, ड्रोन ते हेलीकाप्टर बी इलाके गी खंगाला करदे ना। कन्ने लगदे राजौरी जिले च बी कुंदर ते कन्ने लगदे शहादरा शरीफ इलाके च व्यापक तुपाई अभियान शुरू कीते दा ऐ। उत्थे अज्ज बड्डुलै त्रुं आतंकवादिणें दे मजूद होने दी खबर थ्होई ही। फिलहाल अजें तोड़ी उंदे नै कोई आमना-सामना नेई होआ ऐ।

<><><><><><>

Khatana-Pak

बीजेपी नेता ते राज्यसभा सदस्य इंजीनियर गुलाम अली खटाना होरें आखेआ ऐ जे भारत पाकिस्तान कन्ने मित्रीपूर्ण सरबंध अदू तोड़ी नेई बनी सकदे जदू तोड़ी अेह आतंकवाद गी अपना समर्थन बंद नेई करदा। इक चैनल गी साक्षात्कार च खटाना होरें टिप्पणी कीती जे पाकिस्तान गी आतंकवाद गी साथ-सहयोग देना बंद करना पौग।

<><><><><><>

Valmiki-Greeting

राश्ट्रपति द्रोपदी मुर्मू, उपराश्ट्रपति जगदीप धनखड ते प्रधानमंत्री नरेंद्र मोदी होरें महर्षि वाल्मिकी जयंती उप्पर देशवासियें गी शुभकामनां दित्तियां। इक सोशल मीडिया पोस्ट च राश्ट्रपति होरें आखेआ जे आदि-कवि वाल्मिकी आस्सेआ रचित धार्मिक ग्रंथ रामायण भगवान श्री राम हुंदी दिव्य गाथा कन्ने मानव समाज गी इक अनमुल्ला तोहफा ऐ। राश्ट्रपति होरें लोकें थमां आदि कवि आस्सेआ दस्से गेदे आदर्श पर टुरने दी गुजारश कीती। उपराश्ट्रपति जगदीप धनखड होरें इस मौके पर लोकें गी शुभकामनां दिंदे होई आखेआ जे महर्षि वाल्मिकी हुंदा ज्ञान, करुणा, सत्य ते धर्म दा संदेश सब्बै लेई ऐ। उनें कामना कीती जे आदि कवि हुंदी शिक्षा देश दा मार्गदर्शन करदी रौहग ते समाज च एकता ते सद्भाव बनाए रखने च मददगार होग। उनें आखेआ जे महर्षि होरें सकारात्मक सोच पर जोर दित्ता। उनें आखेआ जे आदि कवि हुंदे सिद्धांत ते आदर्श नमें भारत गी प्रेरणा ते मार्गदर्शन दिंदे रौहडन।

<><><><><><>

Murugan-IMC

केंद्री सूचना ते प्रसारण राज्यमंत्री डॉ. एल. मुरुगन होरें आखेआ ऐ जे लोकें तगर सेही सूचना ते गुणवत्तापूर्ण सामग्री दा प्रसारण करना प्रसारकें दी इक बड्डी जिम्मेदारी ऐ। डॉ. मुरुगन होरें अज्ज नमीं दिल्ली च इंडिया मोबाइल कांग्रेस च प्रसारण क्षेत्र च उभरदे साधनें ते टेक्नालजिएं पर आयोजित इक सिम्पोजियम गी संबोधित कीता। उनें भविष्य लेई नमीं टेक्नोलॉजीं गी अपनाने दे महत्व ते प्रसारण दी बदलाव आहली शक्ति दा जिक्र कीता। मुरुगन होरें आखेआ जे केंद्रीय मंत्रीमंडल च हाल च गै 234 शैहरें च 730 नमें निजी रेडियो चैनल स्थापित करने दी मंजूरी दित्ती। डॉ. मुरुगन होरें सब्बै लेई उच्च गुणवत्ता दी मीडिया सामग्री दी पुज्ज यकीनी करने ते आर्थिक विकास च प्रसारण क्षेत्र दी भूमिका गी सशक्त बनाने लेई उन्नत टेक्नोलॉजी दे प्रयोग दी सरकार दी बचनबद्धता दी पुष्टि कीती।

<><><><><><>